



魏本紀第一
魏之先出自黃帝軒轅氏黃帝子曰昌意昌意之
封北國有大鮮卑山因以為號其後世為君長統幽都之
北廣漠之野畜牧遷徙射獵為業淳樸為俗簡易為化不
為文字刻木結繩而已時事遠近人相傳授如史官之紀
錄焉黃帝以土德王北俗謂土為托謂后為跋故以為氏
其裔始均杜堯時逐女魃於弱水北人賴其勲舜命為田
祖歷三代至秦漢種鬻獫狁山戎匈奴之屬累代作害中
州而始均之裔不交南夏是以載籍無聞積六七十年代至
成皇帝諱毛立統國三十六大姓九十九威振北方成帝

北史一

王

北史第一卷

一五廿頁中缺第

北史西頁

崩節皇帝實立節帝崩莊皇帝觀立莊帝崩明皇帝棲立
明帝崩安皇帝越立安帝崩宣皇帝推寅立宣帝南遷大
澤方千餘里厥土昏冥沮洳謀更南徙未行而崩景皇帝
利立景帝崩元皇帝俟立元帝崩和皇帝肆立和帝崩定
皇帝棧立定帝崩僖皇帝蓋立僖帝崩威皇帝僧立威帝
崩獻皇帝隣立時有神人言此土荒遐宜徙建都邑獻帝
年老乃以位授子聖武皇帝命南移山谷高深九難入阻
於是欲止有神獸似馬其聲類牛導引歷年乃出始居匈
奴故地其遷徙策略多出宣獻二帝故時人並號曰推寅
蓋俗云鑽研之義

聖武皇帝諱詰汾嘗田於山澤歛見輜輶自天而下既至
見美婦人自稱天女受命相遇旦日請還期年周時復會
于此言終而別及暮帝至先田處果見天女以所生男授
帝曰此君之子也當世為帝王語訖而去即始祖神元皇
帝也故時人諺曰詰汾皇帝無婦家力微皇帝無舅家帝
崩神元皇帝立

神元皇帝諱力微元年歲在庚子先是西部內侵依於沒
鹿迴部大人竇賓神元有雄傑之度後與賓攻西部賓軍
敗失馬步走神元使以所乘駿馬給之賓歸求馬主帝隱
而不言賓後知大驚將分國之半奉帝帝不受乃進其愛

女賓猶思報恩乃從帝所欲徙所部北居長川積數年舊
部人咸來歸附及賓臨終戒其二子使謹奉神元其子不
從乃陰謀逆帝召殺之盡并其衆諸部大人悉服控弦之
士二十餘萬三十九年遷於定襄之盛樂四月祭天諸部
君長皆來助祭唯白部大人觀望不至徵而戮之遠近肅
然帝乃告諸大人為與魏和親計四十二年遣子文帝如
魏且觀風土是歲魏景元二年也文帝諱沙漠汗以國大
子留洛陽後文帝以神元春秋已高求歸晉武帝具禮護
送五十六年文帝復如晉其冬還國晉征北將軍衛瓘以
文帝雄異恐為後患請留不遣復請以金錦賂國之大人

今致間隙五十八年方遣帝神元使諸部大人詣陰館迎
帝酒酣帝仰視飛鳥飛丸落之時國俗無彈衆大驚相謂
曰太子被服同南夏兼奇術絕人若繼國統變易舊俗吾
等必不得志乃謀危害帝並先馳還曰太子引空弓而落
飛鳥似得晉人異法自帝在晉後諸子愛寵神元頗有所
惑及聞諸大人請因曰當便除之於是諸大人馳詣塞南
矯害帝其年神元不豫烏丸王庫賢親近任勢先受衛瓘
之貨欲沮動諸部因於庭中礪鉞斧曰上恨汝曹讒殺太
子欲盡收諸大人長子殺之大人皆信各各散走神元尋
崩凡嚮國五十八年年一百四歲道武即位尊為始祖子

章皇帝悉鹿立時諸部離叛帝九年而崩弟平皇帝綽立
七年而崩文帝少子思皇帝立

思皇帝諱弗政崇寬簡百姓懷服一年而崩神元子昭帝
祿官立帝九年分國為三部一居上谷北濡源西東接宇
文部自統之一居代郡之參合陂北使文帝長子桓帝諱
猗屯統之一居定襄之盛樂故城使桓帝弟穆帝猗盧統
之自神元以來與晉和好是歲穆帝始出并州遷雜胡北
徙雲中五原朔方又西度河擊匈奴烏丸諸部自杏城以
北八十里迄長城原夾道立碣與晉分界二年葬文帝及
皇后封氏初思帝欲改葬未果而崩至是述成前意焉

年桓帝度漠北巡因西略諸國凡積五歲諸部降附者三
十餘國桓帝英傑魁岸馬不能勝常乘安車駕大牛牛角
容一石帝曾中蠱嘔吐之地仍生榆參合陂土無榆故時
人畏之十年匈奴別種劉元海反晉於離石自號漢王并
州刺史司馬騰來乞師桓帝與帝大舉以助之大破元海
衆於西河上黨桓帝與騰盟於汾東而還乃使輔相衛雄
段繁於參合陂西累石為亭樹碑以記行焉十一年晉假
桓帝大單于金印紫綬是歲桓帝崩桓帝統部凡十一年
後定襄侯衛操樹碑於大邗城以頌功德子普根代立十
三年昭帝崩穆帝遂總攝三部為一統帝天姿英峙勇略

過人元年劉元海僭帝號自稱大漢三年晉并州刺史劉
琨遣子導為質乞師帝使弟子平文皇帝助琨破白部大
人次攻鐵弗劉武晉懷帝進帝大單于封代公帝以封邑
去國縣遠從琨求句注陘北地琨大喜乃徙馬邑陰館樓
煩繁峙崞五縣人於陘南更立城邑盡獻其地東接代郡
西連西河朔方數百里帝乃徙十萬家以充之六年城盛
樂以為北都脩故平城以為南都帝登平城西山觀望地
勢乃更南百里於灑水之陽黃瓜堆築新平城晉人謂之
小平城使子六脩鎮之統領南部八年晉愍帝進帝為代
王置官屬食代常山一郡先是國俗寬簡至是明刑峻法

諸部人多以違命得罪凡後期者皆與部衆多之或有室家
相攜悉赴死所人問何之曰當就誅其威嚴若此九年帝
乃之脩不至怒討之失利遂崩普根先守外境聞難來攻
六脩滅之普根立月餘薨普根子始生桓帝后立之又薨
思帝子平文皇帝立

平文皇帝諱鬱律姿質雄壯甚有威略元年歲在丁丑二
年劉武據朔方來侵西部帝大破之西兼烏孫故地東吞
勿吉以西控弦上馬將百萬是歲晉元帝即位於江南劉
曜僭帝位帝聞晉愍帝為曜所害顧謂大臣曰今中原無
主天其負我乎曜遣使請和帝不納三年石勒自稱趙王

遣使乞和請為兄弟帝斬其使以絕之五年晉元帝遣使
韓暢加宗爵服帝絕之講武有平南夏志桓帝后以帝得
衆心恐不利己子害帝遂崩大人死者數十人天興初追
尊曰太祖

桓帝中子惠帝賀傳立以五年為元年帝未親政事太后
臨朝遣使與石勒通和時人謂之女國使四年帝始臨朝
以諸部人情未悉款順乃築城於東木根山徙都之五年
帝崩弟煬帝紇那立以五年為元年三年石勒遣石季龍
寇邊部帝禦之不利遷於太窰時平文帝長子烈帝居於
舅賀蘭部帝遣使求之賀蘭部帥藹頭擁護不遣帝怒召

字文部并刀擊藹頭字文衆敗帝還太窰五年帝出居於
字文部賀蘭及諸部大人共立烈帝

烈皇帝諱翳槐以五年為元年石勒遣使求和帝遣弟昭
成帝如襄國從者五千餘家七年藹頭不脩臣職召而戮
之國人復貳於是煬帝自字文部還入諸部大人復奉之
煬帝以烈帝七年為後元年時烈帝出居於鄴三年石季
龍納烈帝於太窰國人二千餘家部落叛煬帝出居於慕
容部烈帝復立以煬帝二年為後元年城盛樂城在故城
東南十里一年而崩弟昭成皇帝立
昭成皇帝諱行翼樵平文皇帝之次子也生而奇偉寬仁

大度身長八尺隆準龍顏高髮委地卧則乳垂至席烈帝
臨崩顧命迎帝曰立此人則社稷乃安故帝弟孤自詣鄴
奉迎與帝俱還建國元年十一月帝即位於繁時北時年
十九二年春始置百官分掌衆職東自穢貊西及破落那
莫不款附五月朝諸大人於參合陂議定都灑源川連日
不決乃從太后計而止媽慕容晃妹為皇后三年春移都
雲中之盛樂宮四年築盛樂城於故城南八里皇后慕容
氏崩十月劉武寇西境帝遣軍大破之武死子務桓立始
來歸順帝以女妻之七年二月遣大人長孫秩迎后慕容
氏於和龍晃送女於境七月慕容晃遣使來聘求交婚帝
許之以烈帝女妻焉十四年帝以中州紛擾將親率六軍
乘石氏之亂廓定中原諸大人諫乃止十八年太后王氏
崩十九年正月劉務桓死其弟閼頭立潛謀反二十一年
閼頭部人多叛懼而東走度河半濟而冰陷後衆盡歸其
兄子悉勿祈初閼頭之叛悉勿祈兄弟十二人在帝左右
蓋遣之歸欲其自相猜離至是悉勿祈奪其衆閼頭窮而
歸命帝待之如初二十二年春帝東巡桑乾川四月悉勿
祈死弟衛辰立二十三年六月皇后慕容氏崩七月衛辰
來會葬因求婚許之二十五年帝南巡君子津二十八年
正月衛辰謀反度河東帝討之衛辰懼遁走二十年十月

帝征衛辰時河冰未成帝乃以芻絙約漸俄然冰合乃散芻於上水草相結若浮橋衆軍利涉衛辰與宗族西走收其部落而還三十四年春長孫斤謀反伏誅斤之反也拔刃向御坐太子寔格之傷脇五月薨後追謚焉是爲獻明皇帝七月皇孫珪生大赦三十九年苻堅遣其大司馬苻洛帥衆二十萬及其將朱彤張蚝鄧羗等諸道來寇王師不利帝特不豫乃率國人避於陰山之北高車雜種盡叛四面寇抄不得芻牧復度漠南堅軍稍退乃還十二月至雲中旬有二日皇子寔君作亂帝暴崩時年五十七道武即位尊曰高祖帝性寬厚時國少繒帛代人許謙盜絹一

疋守者以告帝匿之謂燕鳳曰吾不忍視謙之面卿勿洩之謙或慙而自殺爲財辱士非也帝嘗擊西部叛賊流矢中目賊破後諸大臣執射者各持錐刀欲屠割之帝曰各爲其主何罪也釋之其仁恕若此

太祖道武皇帝諱珪昭成皇帝之嫡孫獻明帝之子也母曰獻明賀皇后初因遷徙游於垂澤寢寤日出室內寤而見光自牖屬天歛然有感以建國三十四年七月七日生帝於參合陂北其夜復有光明昭成大悅羣臣稱慶大赦告于祖宗保者以帝體重倍於常兒竊獨奇怪明年有榆生於薊胞之坎後遂成林帝弱而能言自有光顯廣額大

年六歲而昭成崩苻堅遣將內侮將遷帝長安賴燕鳳乃
免堅軍既還國衆離散堅使劉庫仁劉衛辰分攝國事南
部大人長孫嵩及元他等盡將故人衆南依庫仁帝於是
轉在獨孤部元年葬昭成皇帝於金陵營梓宮木材盡生
成林帝雖冲幼而巖然不群劉庫仁常謂其子曰帝有高
天下之志必興復洪業七年十月晉敗苻堅于淮南慕容
文等殺劉庫仁弟眷代攝國部八年慕容暉弟冲僭立姚
萇自稱大單于萬年秦主慕容垂僭稱燕王九年劉庫仁
子顯殺眷而代之乃將謀逆商人王霸知之復帝曰於衆
中帝乃馳還時故大人梁益子六眷爲顯謀主盡知其
計密使部人穆崇馳告帝乃陰結舊臣長孫健元他等因
率賀蘭部其日顯果使人殺帝不及語在獻明太后傳是
歲乞伏國仁私署秦河二州牧大單于姚萇殺苻堅子
不僭即皇帝位於晉陽

登國元年春正月戊申帝即代王位郊天建元大會於平
川復以長孫嵩爲南部大人以叔孫普洛爲北部大人是
月慕容垂僭即皇帝位於中山國號燕二月秦定襄之盛
樂息衆課農慕容冲爲其部下所殺夏四月改稱魏王五
月姚萇僭即皇帝位於長安國號大秦秋八月劉顯遣弟
元泥迎皇叔父窟咄于慕容永以兵隨之來逼南境帝左

右于桓等與諸部大人謀應之事洩誅造謀者五人餘悉
不問帝慮內難乃北踰陰山幸賀蘭部阻山爲固遣行人
安同長孫賀徵師于慕容垂垂令其子賀麟率師隨同等
軍未至而寇逼於是北部大人叔孫普洛等十三人及諸
烏丸亡奔衛辰帝自營山幸牛川屯于延水南出代谷會
賀麟於高柳大破寇咄悉收其衆冬十月苻丕爲晉將馮
該所殺慕容永僭即皇帝位於長子十一月苻登僭即皇
帝位於隴東十二月慕容垂遣使奉帝西單于印綬封上
谷正帝不納

二年夏五月遣安同徵兵於慕容垂垂遣子賀麟率衆來

會六月帝親征劉顯顯奔慕容永盡收其部落冬十二月

巡松漠還幸牛川

三年夏五月癸亥北征庫莫奚大破之六月乞伏國仁死
其弟乾歸立私署河南王秋七月庫莫奚部帥鳩集遺散
夜犯行宮縱騎撲討盡滅之八月使元原公儀於慕容垂
冬十月垂遣使朝貢

四年春正月甲寅襲高車諸部落二月癸巳遂至女水討
此突隣部竝大破之是月呂光自稱三河王夏五月使陳
留公暉於慕容垂冬十月垂遣使朝貢

五年春三月甲申西征次鹿渾海襲高車交統部大破之

慕容垂遣子賀麟來會夏四月景寅行辛意幸山與賀麟
討賀蘭紇奚諸部落大破之秋八月還幸牛川使秦王觚
於慕容垂九月壬申討叱奴部囊曲水破之冬十月討高
車豆陳部於狼山破之十二月帝還次白漠

六年春正月幸紐埏川三月遣九原公儀陳留公虔等西
討黠弗部大破之夏四月祭天秋七月壬申講武于牛川
慕容垂止秦王觚而求名馬帝絕之乃遣使於慕容永永
使其大鴻臚慕容鈞奉表勸進尊號九月帝襲五原屠之
收其積穀還紐埏川於摑陽塞北樹碑記功冬十月戊戌
北征蠕蠕追破之於大磧南商山下十一月戊辰還幸紐

埏川戊寅衛辰遣子直力鞬寇南部壬午帝大破之於鐵
歧山南衛辰父子奔遼十二月滅之衛辰少子屈丐亡奔
薛于部自河以南諸部悉平收衛辰子弟宗黨無少長五
千餘人盡殺之是歲起河南宮

七年春正月幸木根山遂次黑鹽池饗群臣比之美水三
月還幸河南宮秋七月行幸漠南仍築巡臺冬十二月慕
容永遣使朝貢

八年春正月南巡二月幸殺羊原赴白樓夏六月北巡秋
七月臨幸新壇先是衛辰子屈丐奔薛于部徵之不送八
月帝南征薛于部屠其城九月還幸河南宮

九年春三月北巡使東平公元儀屯田於河北五原至於
相陽塞外夏五月田於河東秋七月還幸河南宮冬十月
蠕蠕社論等率部落西走是歲姚萇子興儻立殺符登慕
容垂滅永

十年秋七月慕容垂遣其子寶來寇五原八月帝親兵於
河南冬十月辛未寶燒船夜遁己卯帝進軍濟河乙酉夕
至參合破景戌大破之禽其王公以下文武將吏數千人
於俘虜中擢其才識者賈彞賈閏鼎崇等參謀議憲章故
寶十二月還幸雲中之盛樂

皇始元年春正月大蒐于定襄因東幸善無北陂三月慕

容垂寇桑乾川陳留公虔死之垂遂至平城西北閭帝將
至乃築城自守疾甚遂遁死於上谷子寶秘喪還至中山
乃僭立夏六月丁亥皇太后賀氏崩是月葬獻明太后呂
光僭稱天王國號涼秋七月左司馬許謙上書勸進尊號
於是改元始建天子旌旗出警蹕八月己亥大舉討慕
容寶皇帝親勒六軍四十餘萬南出馬邑踰句注旌旗絡繹
二千餘里鼓行而前人羣皆震別詔將軍封真等從東道
襲幽州圍薊九月戊午次陽曲乘西山臨觀晉陽寶并州
牧遼西王農棄城遁并州平初建臺省置百官封拜公侯
將軍刺史太守尚書郎以下悉用文人帝初拓中原留心

尉納諸士大夫詣軍門者無少長皆引入得盡言苟有
微能感家叙用已未詔輔國將軍奚牧略地晉川獲慕容
寶丹楊玉買得等於平陶城九月晉孝武帝殂冬十一月
庚子朔帝至真定自常山以東守宰或捐城奔竄或稽顙
軍門唯中山鄴信都三城不下別詔東平公儀攻鄴冠軍
將軍王建左軍將軍李栗等攻信都軍所行不得傷桑棗
戊午進軍中山己未圍之帝曰朕量寶不能出戰必憑城
自守急攻則傷士久守則費糧不如先平鄴信都然後還
取中山諸將稱善丁卯車駕幸魯口城

二年春正月壬戌帝引騎圍信都其夜寶真州刺史宜都

王慕容鳳踰城奔中山癸亥寶輔國將軍張襄護軍將軍

徐超舉城降是月鮮卑秃髮烏孤私署大單于西平王二

月丁丑帝軍于鉅鹿之栢肆塢臨淖池水其夜寶乘衆犯

營燎及行宮兵人駭散帝驚起不及衣冠跣出擊鼓俄而

左右及中軍將士稍集帝設奇陣列烽燧外縱騎衝之寶

衆大敗走還中山獲其器械數十萬計寶尚書閔亮祕書

監崔暹等降者相屬賜拜職爵各有差三月己酉車駕次

盧奴寶求和請送秦主觚割常山以西奉魏乞守中山以

東帝許之已而寶背約辛亥車駕次中山命將圍之是夜

寶弟督驍將妻丁走西山寶恐賀麟先據和龍壬子夜北

遁城內共立慕容普隣為主夏四月帝以軍糧不繼詔東
平公儀罷鄴圍徙屯鉅鹿五月庚子帝以中山城內為普
隣所脅乃投喻之甲辰曜兵揚威以示城內命諸軍罷圍
南徙以待其變甲寅以東平公儀為左丞相封衛王進襄
城公題爵為王秋七月普隣遣烏丸張曠率五千餘人出
城求食寇靈壽晉驎自中入曠軍因其衆復入中山
殺普隣而自立八月甲寅朔帝進軍九門時大疫人馬半
死者十五六中山猶拒守羣臣咸思北還帝知之謂曰斯
固天命將若之何四海之人皆可與為國在吾所以撫之
耳何恤乎無人羣臣乃不敢言九月賀驎飢窮率三萬餘

人寇新市甲子晦帝進軍討之太史令晁崇奏曰不吉帝
曰何也對曰紂以甲子亡兵家忌之帝曰周武不以甲子
勝乎崇無以對冬十月景寅帝進軍新市賀驎退阻泝水
依漸洳澤以自固甲戌帝臨其營戰於義臺塢大破之賀
驎單馬走鄴慕容德殺之甲申賀驎所署公卿尚書將吏
士卒降者二萬餘人其將張驤李沈慕容文等先來降尋
皆亡還是日復獲之皆赦而不問獲其所傳皇帝璽綬圖
書府庫珍寶中山平乙酉襄城王題薨

天興元年春正月慕容德走保滑臺衛王儀剋鄴庚子行
幸貞定遂幸鄴一日姓有老病不能言存者詔郡縣振恤之

帝至鄴巡登臺樹徧覽宮城將有定都之志乃置行臺遂
還中山所過存問百姓詔大軍所經州郡皆復其租一年
除山東人租賦之半車駕將北還發卒萬人通直道自望
都鐵關繫恒嶺至代五百餘里帝慮還後山東有變乃於
中山置行臺詔衛王儀鎮之使略陽公遵鎮渤海之合口
右軍將軍丑國先督租于冀州聞帝將還謀反欲襲信都
安南將軍長孫高執送斬之辛酉車駕發中山至于望都
堯山從山東六州人吏及徒何高麗新夷二十六署百工
伎巧十餘萬口以充京師車駕次于恒山之陽博陵渤海
章武諸郡羣盜並起略陽公遵等討之是月慕容德自稱

燕王據廣固二月車駕至自中山幸繁峙時宮吏選北衛詔
給內徙新戶耕牛計口受田三月徵左丞相衛王儀還京
師詔略陽公遵代鎮中山夏四月壬戌以歷陽公穆崇為
太尉鉅鹿公長孫高為司徒進封略陽公遵為常山王南
安公順為毗陵王祭天於西郊旗幟有加焉廣平太守遼
西公意列謀反與郡人韓奇矯假讖圖將襲鄴城詔反者
就郡賜死是月蘭汗殺慕容寶而自立為大單于昌黎王
六月景子詔有司議定國號羣臣奏曰昔周秦以前帝王
居所生之士及王天下即承為號今國家啟基應承應以
代為號詔曰昔朕遠祖摠御幽都控制遐國雖踐王位未

定九州遠于朕躬掃平中土凶逆蕩除遐邇率服宜仍先
號為魏秋七月遷都平城營宮室建宗廟立社稷慕容
寶亨盛殺蘭汗而自立為長樂王八月詔有司正封畿制
郊甸端徑術樹道里平五權較五量定五度遣使循行郡
國舉奏守宰不法者親覽察黜陟之冬十月起天文殿十
一月辛亥尚書吏部郎中鄧彥海典官制立爵品定律呂
協音樂儀曹郎中董謚撰郊廟社稷朝覲饗宴之儀三公
郎中王德定律令申科禁太史令晁崇造渾儀考天象
部尚書崔宏摠裁之閏月左丞相衛王儀及王公卿士詣
闕上書曰臣等聞宸極居中則列宿齊其軌帝王順天則

羣后仰其度伏惟陛下德協二儀道隆三五仁風被于四
海成化塞于天區澤及昆蟲恩霑行葦謳歌所屬表歸
心而躬履謙虛退身後已宸儀未彰衣服未御非所以上
允皇天之意下副樂推之心臣等謹昧死以聞帝三讓乃
許之十二月己丑帝臨天文殿太尉司徒進璽綬百官咸
稱萬歲大赦改元追尊成帝以下及后號謚樂用皇始之
舞詔百司議定行次尚書崔宏等奏從上德服色尚黃數
用五祖以未臘以辰犧牲用白玉郊立氣宣贊時令敬授
人時行貞之正徒六州二十二郡守宰豪傑吏人千家
于代都

二年春正月甲子初祀上帝于南郊以始祖神元皇帝配
降壇視燎成禮而反之丑赦京師始制三駕之法庚午北
巡分命諸將大襲高車常山守邊三軍從東道出長川高
原王樂真等七軍從西道出牛川車駕親勅六軍從中道
自鞍_鞍水西北出二月丁亥朔諸軍同會破高車雜種三
十餘部衛王儀督三將別從西北絕漠千餘里破其遺迸
七部還次牛川及薄山並刻石紀功以所獲高車衆起徙
苑於南臺陰北距長城東苞白登屬之西山廣輪數十里
鑿渠引武川水注之苑中疏為三溝分流宮城內外又穿
鴻鴈池三月己未車駕至自北伐甲子初令五經書各

置博士增國子太學生各三千人是月氏人李辯叛慕容
德求援於鄴行臺尚書和跋以輕騎應之剋滑臺收德宮
人府藏秋七月起天華殿辛酉大閱于鹿苑八月增啓京
城十二門作西武庫除州郡人租賦之半辛亥詔禮官備
撰衆儀著于新令范陽人盧溥聚衆海濱稱幽州刺史攻
掠郡縣殺幽州刺史封沓于是月禿髮烏孤死其弟利鹿
孤立遣使朝貢冬十月太廟成遷神元平文昭成獻明皇
帝神主于太廟十二月天華殿成呂光立其子紹為天王
自稱太上皇及死庶子纂殺紹而僭立
三年春正月戊午材官將軍和突破盧溥於遼西獲之及

其子煥傳送京師輟之癸亥祀北郊分命諸官循行州郡
觀風俗察舉不法二月丁亥詔有司祀日于東郊始耕籍
田壬寅皇子聰薨三月戊午立皇后慕容氏是月穿城南
渠通於城內作東西魚池夏四月姚興遣使朝貢五月戊
辰詔謁者僕射張濟使於興已巳東巡遂幸涿鹿遣使者
以太牢祀帝堯帝舜廟西幸馬邑觀灑源六月庚辰朔日
有蝕之秋七月乞伏乾歸大為姚興所破壬子車駕還宮
起中天殿及雲母堂金華室時太史屢奏天文錯亂帝親
覽經占多云宜改王易政於是數革官號欲以防塞凶狡
消弭災變已而慮臣下疑惑冬十二月景申下詔述成敗
之理鑿殷周之失革秦漢之弊以喻臣下是歲河右諸郡
奉涼武昭王李玄盛為秦涼二州牧涼公肇興霸業年號
庚子

四年春二月丁亥命樂師入學習舞釋菜于先聖先師丁
酉分命使者巡行州郡聽察辭訟糾劾不法是月呂光弟
子隆弒呂纂而自立三月帝親漁薦于寢廟夏四月辛卯
罷鄴行臺詔有司明揚隱逸五月起紫極殿玄武樓涼風
觀石池鹿苑臺六月盧水胡沮渠蒙遜私署涼州牧張掖
公秋七月詔充州刺史長孫肥南徇許昌彭城詔賜天下
鎮戍將士布帛各有差八月段興殺慕容盛叔父熙盡誅

段氏僭即皇帝位冬十二月集博士儒生比衆經文學義類相從凡四萬餘字號曰衆文經是歲涼武昭王沮渠蒙遜並遣使朝貢

五年春正月帝聞姚興將寇邊庚寅大簡輿徒詔并州諸軍積穀于平陽乾壁三月禿髮利鹿孤死夏五月姚興遣其弟義陽王平來侵平陽攻陷乾壁秋七月戊辰朔車駕西討八月乙巳至乾壁平固守進軍圍之姚興悉舉其衆來救甲子帝度蒙坑逆擊輿軍大破之冬十月平赴水而死俘其餘衆三萬餘人獲輿尚書左僕射狄伯支以下四品將軍以上四十餘人獲前亡臣王次多斬勒並斬以徇

輿頗使請和帝不許羣臣請進平蒲坂帝不從

申班師十一月車駕次晉陽徵相州刺史友安爲司空十

二月辛亥至自西征越勒莫弗率其部萬餘家內屬

六年春正月辛未朔方尉遲部別帥率萬家內屬入居雲

中夏四月癸巳朔日有蝕之五月大簡輿徒將略江淮秋

七月鎮西大將軍司隸校尉毗陵王順有罪以王還第戊

子北巡築離宮于豺山縱士校獵東北踰罽嶺出參合代

谷九月行幸南平城規度澤南夏屋山背黃瓜堆將建新

邑辛未車駕還宮冬十月起西昭陽殿乙卯立皇子嗣爲

齊王加車騎大將軍位相國紹爲清河王加征南大將軍

熙為陽平王曜為河南王封故秦愍王子莫為豫章王陳
留桓王子悅為朱提王丁巳晉人來聘十一月庚午將軍
伊謂大破高車十二月晉桓玄廢其主司馬德宗為平固
王而自立僭號楚

天賜元年春二月晉劉裕起兵誅桓玄三月初限縣戶不
滿百罷之夏五月置山東諸治發州郡徒謫造兵甲秋九
月帝臨昭陽殿分置眾職引朝臣文武親自簡擢彙能叙
用制爵四等曰王公侯子除伯男之號追錄舊臣加封爵
各有差是秋江南大亂流人繼負奔淮北者行道相尋冬
十月辛巳大赦改元築西宮十一月幸西宮大選臣寮令

各辯宗黨保舉才行諸部子孫失業賜爵者二千餘人
二年春正月晉主司馬德宗復位夏四月祀西郊車旗盡
黑冬十月慕容德死

三年春正月甲申北巡幸豺山岩校獵還至羣孤山二月
乙亥幸代園山建五石亭三月庚子車駕還宮夏四月庚
申復幸豺山宮占授著作郎王宜弟造兵法孤虛立成園
三百六十時遂登定襄角史山又幸馬城甲戌車駕還宮
六月發八部五百里內男子築溫南宮門闕高十餘丈引
溝穿池廣苑園規立外城方二十里分置市里經途洞達
三十日罷秋七月太尉穆罏薨八月甲辰行幸豺山宮夏

至青牛山景辰西登武要北原觀九十九泉造石亭遂之
石漠九月甲戌朔幸漠南鹽池壬午至漠中觀天鹽池度
漠北之吐鹽池癸巳南還長川景崇臨觀長陂冬十月庚
申車駕還宮

四年春二月封皇子脩為河間王勅文為長樂主運為廣
平王黎為京兆王夏五月北巡自參合陂東過蟠羊山大
雨暴水流輜車數百乘殺百餘人遂東北踰石漠至長川
幸濡源常山王遵有罪賜死六月赫連屈丐自稱大單于
太夏天王秋七月西幸參合陂築北宮垣三旬而罷乃還
宮慕容寶養子高靈殺慕容熙而自立僭號天王八月誅

司馬康岳

五年春正月行幸豳山宮遂如參合陂觀漁于延水至甯
川三月姚興遣使朝貢秋七月戊戌朔日有蝕之冬十月
禿髮禪稱僭即涼王位

六年夏帝不豫初帝服寒食散自太醫令陰美死後藥數
動發至此愈甚而災變屢見憂慮不安或數日不食或不
寢達旦歸各羣下喜怒乖常謂百寮左右不可信慮如天
文之占或有肘腋之虞追思既往成敗得失終日竟夜獨
語不止若傍有鬼物對揚者朝臣至前追其舊惡便見殺
害其餘或以顏色變動或以喘息不調或以行步乖節或

以言辭失措帝以為懷惡在心變見於外乃手自毆擊死者皆陳天安殿前於是朝野人情各懷危懼有司廢怠莫相督攝百工偷劫盜賊公行巷里之間人為稀少帝亦聞之曰朕故縱之使然幸過災年當更清整之耳秋七月慕容氏支屬百餘家謀欲外奔發覺伏誅死者三百餘人八月衛王儀謀叛賜死十月戊辰清河王紹作亂帝崩於天安殿時年三十九永興二年九月甲寅上諡曰宣武皇帝葬於盛樂金陵廟號太祖泰常五年改諡曰道武

太宗明元皇帝諱嗣道武皇帝之長子也母曰劉貴人登國七年生於雲中宮道武晚有男聞而大悅乃大赦帝明

歡寬毅非禮不勅天興六年封齊王拜相國初帝母既賜死道武召帝告曰昔漢武將立其子而殺其母不令婦人與國政汝當繼統故吾遠同漢武帝素純孝哀不自勝道武怒帝還宮哀不自止道武知而又召帝帝故入左右諫請待和解而進帝從之及元紹之逆帝還而誅之

永興元年冬十月壬午皇帝即位大赦改元追尊皇妣為宣穆皇后公卿大臣先罷歸第悉復登用之詔南平公長孫嵩北新侯安同對理人訟簡賢任能是月馮跋弒其主高雲僭號天王國號北燕閏十月丁亥朱提王悅謀反賜死詔都兵將軍山陽侯奚斤巡諸州問人疾苦十一月

戊戌封衛王儀子良為南陽王進陰平公列爵為王改封
高涼王樂貞為平陽王己亥帝始居西宮御天文殿蠕蠕
犯塞是歲乞伏乾歸自稱秦主

二年春正月甲寅朔詔南平公長孫嵩等北征蠕蠕因留
屯漠南夏五月嵩等自大漠還蠕蠕追圍之於牛川壬申
帝北伐蠕蠕聞而遁走車駕還幸參合陂六月晉將劉裕
滅慕容超秋七月丁巳立射臺於陂西仍講武乙丑至自
北伐

三年春二月戊戌詔簡官人非御及伎巧者悉以賜鰥人
己亥詔北新侯安同等持節巡行并定二州及諸山居雜

胡丁零問其疾若察舉守宰不法者辛丑簡官人工伎之
不急者出賜人不能自存者三月己未詔侍臣常佩劍夏
五月景靈復出宮人賜鰥人辛卯車駕謁金陵於益樂已
己昌黎王慕容伯兒謀反伏誅六月姚興遣使朝貢秋七
月戊申賜衛士醕三日冬十一月丁未大閱于東郊

四年春二月癸未登獸園射猛獸夏四月乙未宴羣臣於
西宮使各獻直言勿有所諱六月乞伏乾歸為兄子入府
所弑閏月景辰大閱于東郊秋七月己巳朔東巡置四廂
大將又放十二時置十二小將以山陽侯奚斤元城公屈
行左右丞相己卯大獮于石會山戊子臨去歲波觀漁庚

寅至于濡源西巡辛北部諸落八月壬子幸西宮臨拔殺
大饗群臣命百姓大酺二日乙卯賜王公以下至宿衛將
士布各有差冬十一月己丑賜宗室近屬南陽王良以下
至於總麻親布帛各有差是月沮渠蒙遜僭稱西河王十
二月丁巳北巡至長城而旋

五年春正月己巳大閱畿內男年十二以上悉集己卯幸
西宮類拔大渠帥四十餘人詣闕奉貢賜以縑帛錦罽各
有差乙酉詔諸州六十戶出戎馬一匹庚寅大閱于東郊
署將帥以山陽侯奚斤為前軍衆三萬陽平王熙等十二
將各一萬騎帝臨白登躬自校閱二月庚戌幸高柳川癸

丑穿魚池於北苑庚午姚興遣使朝貢己卯詔使者巡行
天下招延舊彥搜揚隱逸夏四月乙卯西巡五月乙亥行
幸雲中舊宮之大室景子大赦六月西幸五原校獵于骨
羅山獲獸十萬秋七月己巳還幸薄山帝登觀宣武游幸
刻石頌德之處乃於其旁起石壇而薦饗焉賜從者大酺
於山下前軍奚斤等破越勒倍泥部落於跋那山西徙二
萬餘家而旋景戌車駕自大室西南巡諸部落遂南次定
襄大洛城東踰七嶺山田于善無川八月癸卯車駕還宮
癸丑奚斤等班師甲寅帝臨白登山觀降人數軍實置新
人於大霽給農器計口受田冬十一月癸酉大饗于西宮



原件短缺

25-26

姚興遣使朝貢請進女帝許之

神瑞元年春正月辛酉以禎瑞頻集大赦改元辛巳行幸繁峙賜王公以下至于士卒百工布帛各有差二月戊戌車駕還宮乙卯起豐宮於平城東北夏六月乞伏熾盤滅禿髮得檀秋七月晉將朱齡石滅蜀八月戊子詔馬邑侯元陞孫使於姚興姚興遣使朝貢九月丁巳朔日有蝕之冬十一月壬午詔使者巡行諸州校閱守宰資財非自家所齎悉薄為減守宰不如法聽百姓詣闕告之十二月景戌朔蠕蠕犯塞景申車駕北伐

二年春正月景辰車駕至自北伐二月丁亥大饗于西宮

詔

五年春正月景戌朔自許林東還至長安城觀勞將士大酺二日班禽以賜之己亥車駕還宮三月景戌南陽王意文薨夏四月景寅起灑南宮五月乙酉詔曰宣武皇帝體得一之玄遠應自然之沖妙大行大名未盡盛美今啓縉圖始親尊號其更上尊諡曰道武皇帝以章靈命之先啓聖結心之玄同庚戌淮南侯司馬國璠池陽侯司馬道賜等謀反伏誅六月景寅幸翳犢山是月晉恭帝禪位于宋秋七月丁酉西至五原丁未幸雲中大室賜從者大酺八月癸亥車駕還宮閏月甲午陰平陽列薨是歲西涼亡六年春二月己亥詔天下戶二十輸戎馬一匹大牛一頭

三月甲子陽平王熙薨乙亥制六部人羊蒲百口者調戎馬一匹發京師六千餘人築苑起自舊苑東苞白登周回四十餘里夏六月乙酉北巡至于蟠羊山秋七月乙卯車駕還宮癸酉西巡獵于柞山親射猛獸獲之遂至于河八月庚子大獮于犢渚九月庚戌車駕還宮壬申宋人來聘冬十月己亥行幸代十二月景申西巡于雲中

七年春正月甲辰朔自雲中西幸屋簷城賜從者大酺三日二月景戌車駕還宮三月乙丑河南王曜薨夏四月甲戌封皇子燾為太平王拜相國加大將軍不為樂平王加車騎大將軍彌為安定王加衛大將軍範為樂安王加中

軍大將軍健為永昌王加撫軍大將軍崇為建寧王加輔國大將軍俊為新興王加鎮軍大將軍獻懷長公主子嵇敬為長樂王拜大司馬大將軍初帝服寒食散頻年發動不堪萬機五月立太平王燾為皇太子臨朝聽政是月宋武帝殂秋九月詔司空奚斤等帥師伐宋乙巳幸灑南宮遂如廣寧己酉詔皇太子率百國以法駕田于東苑車乘服物皆以乘輿之副辛亥築平城外郭周回二十二里辛酉幸嶠山遣使者祠黃帝唐堯廟因東幸幽州見耆年問其所苦賜以爵號分遣使者巡行州郡觀察風俗冬十月甲戌車駕還宮復所過田租之半奚斤等濟河攻滑臺不

拔求濟師帝怒不許議親南征爲其聲援壬辰南巡出自
天門關踰恒嶺四方蕃附大人各帥所部從者五萬餘人
十一月皇太子親統六軍鎮塞上安定王彌與北新公安
同居守景午曲赦司州殊死以下景辰次於中山問人疾
苦十二月景戌行幸冀州存問人俗遣壽光侯叔孫達等
率衆自平原東度徇下青兗諸郡

六年春正月景辰行幸鄴存問人俗司空奚斤既平兗豫
還圍武牢宋守將毛德祖距守不下蠕蠕犯塞二月戊辰
築長城於長川之南起自赤城西至五原延袤二千餘里
備置戍衛三月乙卯濟自靈昌夏四月丁卯幸成臯觀武

牢而城內乏水縣緆汲河帝令連艦上疏輶輶絕其汲路
又穿地道以奪其井丁丑幸洛陽觀石經閏月丁未還幸
河內北登太行幸高都已未武牢潰士衆大疫死者十二
三辛酉幸晉陽班賜王公以下至於廝役五月景寅還次
鴈門皇太子率留臺王公迎于句注之北庚寅車駕至自
南巡六月己亥太尉宜都公穆觀薨景辰北巡至參合陂
秋七月幸三會屋侯泉詔皇太子率百官以從八月幸馬
邑觀于灑源九月乙亥車駕還宮冬十月癸卯廣西宮起
外牆周四十里是歲飢詔所在開倉振給十一月己巳
帝崩於西宮特年三十二遺詔以司空奚斤所獲軍實賜

大臣自司徒長孫蒿以下至于士卒各有差二十二月庚子
上謚曰明元皇帝葬于雲中金陵廟稱太宗帝兼資文武
禮愛儒生好覽史傳以劉向所撰新序說苑於經典正義
多有所闕乃撰新集三十篇採諸經史該洽古義云

論曰自古帝王之興誠有天命亦賴累功積德方契靈心
有魏奄宅幽方代為君長神元生自天女桓穆勤於晉室
冥符人事夫豈徒然昭成以雄傑之姿苞君人之量征伐
四越威被遐荒乃改都立號恢隆太業終百六十載光宅
區中其原固有由矣道武顯晦安危之中屈申潛躍之際
驅率遺黎奮其靈武克翦方難遂啓中原垂拱人神贊登

皇極雖冠履不暇棲違外土而制作經謨咸出長乂所謂
大人利見百姓與能抑不世之神武也而屯厄有期禍生
非慮將人事不足豈天實為之乎明元承運之初屬廓定
之始于時狼顧鳩跖猶有窺覷加以天賜之末內難尤甚
帝孝心睿略權正兼運慕業固基內和外撫終能周鄭款
服聲教南被祖功宗德其義良已遠矣

魏本紀第一

北史

上野文庫

校正





白文

